








新遊記序



環山內稱山川之奇者不為少也然奇

不在山川而所恃以為奇者豈不以人哉

今夫將遊去遇有名勝輒揆詞摘藻

非不人然於以余所觀記率多留連先

景凌虛駕空而侈之無當此其遊即

日在叢壑中，占泉石為侶，而萬念所裨，
益人固病其達，且放矣。余竊傷之，如海董
先生少負奇偉，日記萬有餘言，為古今
文並造，玄乘已卓然，稱名家矣。尤烈，以
風節自將，初官比部，見時事，無可人意，
願獨為國慮，輒犯怨凌危，多抗節，極

中或有危之者，多所震撼，若南山當
前，一為動，當是時，人固以天下士奇之矣。
奈何旋蒙貶謫，遠戍粵中，雖身在萬里，
外翩然自適，自燕齊吳楚，以至百粵，足跡幾
半天下，而所涉名山大川，皆夢寐中之藏，以
洩天地之秘，余嘗舉其奇遊，湯和讀之。

乃知先生之遊之論經緯庶品錯綜萬變
雅篇粹製能昔前人所未有以痛仙之抗
而知其意不在酒以魯公之烈而知其凶不
溺邪以子陵之高而知其遁不沉隱以伏波
之勇而知其任非狗時甚則憐才於柳州
招隱於焦巖寓夢於朱張而宵旦動有

貞人之思要之核賢昂古信非浪遊而一
言一義朕、闡淑標準章往勸來當
與名山大川並垂千古其視留連光景侈
言無當者奚啻千里昔人謂德業氣節
文章三者在斯皆足以名字宇宙矣
不朽余則以為德業氣節其主也而文

章特其輔焉耳。主立而輔具，互相成也。若徒以其文而漫無所主，雖有雅詞，藻白猶之載土舟以飭華標人，其謂何？今先生有且為之，此先生之遊，所以為奇。是先生若無假于山川之奇，而山川則固賴先生以為之奇矣。是故驅鯨有文而衡

山奇，再遊有賦，而杰癖奇，非文能自為奇也。有文公坡翁其人，固奇之矣。愷辱知於先生，偶出所紀，不敢以不文辭，漫為之序。

賜進士出身大中大夫前湖廣布政使司叅政致仕郡人沈愷撰

萬曆辛丑小春三日後學楊汝解書

奇遊五述序

昔人謂通天地人曰儒余讀廓然子
五述心誠好之以為今世之儒廓然子
端其人哉夫天地譚深明造化之機
陰陽之義良發前人所未發傳道
統辨蓋憂道之失傳而反言以翼正

闢邪顯真黜偽彼有駑空談博虛
名者覩之且茫然自失矣孔樂叢尤
於今世講學家玩弄景光一種為對
症之藥文思奇偉得之壯騷馬遷而
下弗論也聞韶叢洞識宣尼本志
且於世道升降之幾皇帝王霸幽

微難闡之旨真有心領而神會之
者使得大受斯世豈直偏才小補
云哉曹溪禪叢不齷佛語而善
會佛意蘇子瞻謂范景仁平生不
奉佛却真是學佛作家如廓然子
之叢禪歸儒尤非景仁所及識者余

誠有味乎其言之也廓然子清修立
節志存經世五述乃成遊時所著今
為南光祿卿未竟其用余因湯書此
以俟知者云

隆慶庚午夏六月之吉南京吏部尚
書汶上吳嶽撰 角白楊當時重書

奇游湯紀自引

余本膏腴無奇又素性多癖少
年誤落塵網簡結世緣每俗務
紛靡便自慨然厭倦以故居常
閑闕却帚顛顛鄉人自好者焉

屬者業坐獲譴薄宦遐荒迺幸
與友人眺游山水半收吳楚百
粵之奇燕喜而下勿論也曩時
負氣褊褻漸亦恬歸真境願益
從子自信外膠罔渝雖迫殊險

抱積疴方更照々行後無悔志
云嘗愛昔人茲游奇絕之語謂
今清時寬馭俯軫孤危諸親
值薦紳誼人頗多意氣相憐重
計所得游奇山水咸足稱奇縱

余文不奇宜不可与奇游竟没
也抑嶺海故自多奇余軍無
奇人當之似應詫以為奇苟遂
冥心物表凝志寰中即諸滄嶼
峙流罔星露明本界其又何奇

之有焉郭之奇游湯紀庶以表
余忽湯之私懷云爾或曰記者
記其事子間出議論謂體何曰
古者記事記言體由人作雖然
余所謂湯云湯云又豈敢規

乎文人冢哉

嘉靖甲子孟夏上任日廓然子
題於征颿泊次

姪玉鉉重書

選輯校刻名氏

同事寓客悟齋子吳時來

朗寧復陽道人陳大綸

從祖紫岡居士宜陽 全選

嶺表門人賈仕廖必進鄧之梅杭廷佐梁國賢黃

鶴齡鄧中曜張文謨李潤鄧之松何天

德李湛喬鎮陳起漁梁國相周豫燧等

各抄錄

乙丑年陽至日內弟李承志女弟壻何一鵬弟傳

南州書樓藏書

徐湯殷整理

編列	字	號
年	月	日

南州書樓藏書

史全按

辛丑年中秋日叔思白其旦重選

弟傳文重梓

婿李自約錢龍錫

姪王楷玉珂玉京玉驄玉鉉

玉振玉恩玉階

男玉柱玉衡同校

奇游漫紀目錄

卷之一 記文 出戍道經

發天津記 太白樓游談記

渡寶應湖記 游金焦兩山記

釣臺游談記 遊青原山記

卷之二 記文 楚南結纜

病遊衡嶽記 遊回鴈峯記

遊浯溪記 遊永朝陽巖因泛瀟湘記

夜遊沉香巖記



卷之三 記文 粵徼征次

遊桂林諸巖洞記 渡灘江記

渡左江諸瀧記

卷之四 記文 行役載途

烏蠻瀧夜談記 遊兩山記

渡羅滂記 遊峽山飛來寺記

遊英德觀音巖記 遊曹溪南華寺記

前吳歙序稱此書為奇遊五述故當有奇志此供第五卷故第五卷之目錄亦於此處截之冒充以少卷為全佚矣一紙記

奇游漫紀卷之一

明時遷客雲間董傳策原漢

記文 出戍道經

發天津記

余儕小臣當壯歲遭逢 明望迺遽終矢赤衷欲肩

唐虞拂象恭難壬人之義過計私憂自負熙皞方春

徂夏逮譴獲休 君父恩波浩溢莫罄名狀屬已纍

纍登道舍陸而舟猶苦疲憊未醒臥療罔輟乃四月

十五日渡出天津之南澍雨初霽溫風徐披蓬底蕭

然水光透入余稍稍起伏榻上與家人語因指天津之流興嗟喟焉或唁余曰子胡不玄同嘿嘿自匹水德彼且滔滔東逝知白守黑子胡乃思結幽憂迹涉悻直動與蹇俱言隨患出余憑檣長嘯而不答既而自詫曰噫嘻乎巧拙懸機淵雲殊趣夫人臣者進思效忠退思補過吾方戴 皇慈之曠覃履夷游而式渡又奚暇臨津羨流校方員于改錯哉於時有天津文人者棹而過前曰子行矣子不覩津岸漁人乎夫魚以貪餌入釣然小者易與耳若巨鰲餌大患遲雖

東海任公猶不得易而醢云且此冀方水也在昔鯨治水九載弗成堯始殛之子今慕陳唐虞之治何迫遽乎余迺北向匍伏仰而祝曰願 皇祇德罔渝願諸河伯協恭罔攸私庸以鞏金湯于永世述發天津記

太白樓遊談記

濟寧蓋有太白樓云相傳唐賀知章作令時李白嘗客遊醉歌其處沈光記所云酒樓者也樓故當高阜一望秦嶂諸山宛若屏嶂俯而瞰南旺諸湖水煙雲

蕩射風檣去來掠其面蓋遊之觀畢具焉白嘗書壯
觀二字蕭灑遒勁今存樓中余徃復游京師卽過是
未嘗不登然登亦未之奇也今年戊午夏業以罪廢
而南屬病創初復因更與兩戍友肩負而登樓不加
壯山湖不加高深望不加遠而余三人者顧相與慨
嘆白之才豪不一遇卽余胷中游興勃勃然奇矣世
無知李白者徒以爲詩家最放達者云爾乃余究觀
其卓偉奇崛之氣當其時天子愛幸其才唾手致津
要無難白且出入禁掖渥被寵顧然未嘗一動其衷

臆稍自振搖之筆端也使後之詞人處此方將志滿
意暢揚揚誇榮遇不絕喙矣至其奴視高力士又絕
不與當時執政如林甫國忠輩俛首抑心而奪之氣
視世之穴倖門覬速化者良萬萬也及余讀其清平
調中飛燕昭陽之語欲令人主垂鑒女禍殆猶有風
人譎諫之體焉以彼其才徒且傲浪篇章中無能少
自表見故卽其憂憤悲歌之志一變而爲縱橫放逸
之辭徃徃又詭興于遊仙弔古征夫閨婦以微露其
侘傺鬱伊而不可得紓之愁思王金陵迺以白耽于

奇流沙紀 卷之一
酒婦人而薄其爲人世遂謂白詩徒豪學不關規諷
劣于杜少陵之忠君愛國非惟不知人抑不知詩矣
彼所爲沉酣麴蘖寂莫賢聖亡亦甚乎其時與何誕
之深也及已棄官而歸遭時不造猶自以宗臣欲有
所樹立而適會永王璘之起慨然應招而出意將少
贊其弘濟之謀乃不幸一跌以敗雖託身非所其志
有足悲焉當白起江南應璘之招於時明皇正西幸
賊據關中又未聞靈武之立也白所嚮意規恢恐亦
未爲過計心事不白竟流夜郎然其識郭令公于窮

時終成再造勳謂白爲不知人不可也凡此豈皆醉
人事乃今所傳于世猶以酒樓著稱嗟白有靈當不
一顧此矣余所談白事于樓中至反覆槩其生平私
自負得此語爲奇游而余兩友人顧各持巨觥向余
曰子醉人語也請更益醉焉余不辭而飲之果益醉
而余三人者下樓而登舟則月盈盈白矣時五月十
有一日也明旦起坐舟中有從余者語余昨所語而
余回視游處已渺隔一程不可覩已因筆之以無忘
酒樓之醉云

險

渡寶應湖記

寶應湖故稱險俗有銅高郵鐵寶應之號然余比歲數從北游渡湖湖卽險余未嘗遭也於時中夏水溢風又撼其洪流湖勢險且甚舟之人相顧徬徨恐不可卒渡卽需水退又卒未可期余嘻而咤曰湖之靈寧過苦諸逐臣乃揚馭湖面矯然掀柁而飛水光接天一望無際風獵獵拍檣傍驚濤怒號浪噴如壓衆方覩覩然虞其觸乎石也而前行者一巨買船遽觸石碎矣接而濟者又覆焉於是衆駭愕罔攸措余第

譬曉之曰寧爾神定爾氣務必濟無恐時余小子第侍家大人自淮南而來家大人亦戒舟人謹握柁勿失而張吳兩友人適攜觴過舟中酌家大人余舟人氣益壯云張子持觴酌湖神因誦唐子方平生仗忠信今日任風波之句余與吳子鳴榔而歌之家大人歡然適也已而湖風亦少戢舟將濟俄見湖之南有操舟而過余者至則寶應學訓雷君載酒來訪云余三人睨視良久迎謂之曰風波猛惡若此君奈何犯險言逐臣雷君應曰嘻三君不畏風波余習此湖寧

奇游漫錄 卷之一 五
畏諸遂乃忻然相與飲啜而賦詩焉時風定舟已克
濟迺更有澄霞照耀酒樽中余詩落語云自是波濤
驚壯觀坐來春色總依然紀實也雷旣別去復有老
媪持麥飯來餉而前賈船覆者其人裸而乞食余三
人稍推食食之夜登湖傍廟上北望淮口因憶渡淮
憇平江園倉部錢君水部沈君旣各載酒來而今渡
湖湖水險乃又有雷君載酒來益奇至老媪飯又益
奇於以見風波雖險而穹慈曠放之感亾論士流好
義不爲巨險所撓遇卽村媪一飯固亦

明主惠也抑視往代窘摘窮逐惴惴避親知者大殊
其可無記然余又憶渡濟時水部陳氏少與吳子同
研席聞其來卽惘然避不事事而治河中丞王公者
南岷人也余輩素不識其面顧獨戒津吏俟河滸已
而過舟相勞問且僕僕亟拜至云某敢忘社稷與蔽
君父之仁明前渡淮而治漕中丞傅公亦良然嗟
乎若公輩仰承洪造不畏風伯水師者蓋無幾矣卽
誠多有之余輩風波人固益可恃以無恐哉

遊金焦兩山記

余渡淮而南爰以六月五日渡江於時江流浩浩大風俄起江中浪高于山蓋余又得奇詭觀焉既而風收浪恬日照江面舟子語余當渡余小子策從家大人偕兩友人渡而其甚夷也無何望見金山家大人暨兩友人欣然欲登余蓋已兩度登云既結纜甫登江岸遽有龜上而仰食入寺縱觀復循廊瞰江外鍾山諸勝宛如在目余卑六朝之偏安頌高皇之大烈慨然有觀河洛而培豐芑之思焉已而越毘盧閣入慈觀音殿遂由舊逕出寺摩閱古今人詩刻尋中泠

董氏游焦山
有七律一首
見焦山志
蘇博錄元
書後

此卷生印撰
此書之悟也
吳時來

泉吸之復汲以烹茗甚清其日晡放舟泊北固山下家大人先還家明旦巡院尙仰山君過訪語奮然有奇氣且云明時浩蕩遷客多得奇游余三人遊興方銳又監押官未戒行仰視日方中迺遂復放舟焦山余蓋未嘗遊云山視金山殊大其上僧寺幽閑旁布田疇更平曠憑闌而瞰江洲令人飄飄然有物外之適山以焦光名於是張生為作招隱辭而余與吳生和而題之壁俄有騶從來乃鎮江郡守都君蘇郡節推王君知余三人者當遊因以巡院意攜酒般相隨

古游漫錄 卷之一
云既見歡笑口誦壁間詩復徧遊歷碧桃灣青玉塢
諸僻絕處薄暮還渡江兩君從陸去余三人乘月泝
流江澄于練鼓柁鳴榔豪興輒發而余與兩友人評
兩山之勝則謂金小而麗其望遠焦曠而幽其棲息
妙惟人所愛好焉然潤當大江下流水勢入海甚近
而兩山相對束隘口寔有砥柱洪流撐峙江海之勢
屬者島夷竊發沃土為墟江南民力竭矣 聖明軫
念元元數督過諸守吏誰能假兩山之靈為我畿輔
拯淪溺也兩友人曰余輩忽漫游耳君慎無多語乃

記而藏之笥中

釣臺遊談記

余至武林憇西湖之上稍稍尋訪舊遊若淨慈飛來
峯靈隱天竺諸勝然不能縱覽觀又所闕游殊多以
故其所及游畧而不記而余辭家大人渡錢塘江於
時懷家鄉之漸遠慣霸圖之屢更蓋貪遊惜勝之思
益不能置焉及泝桐廬過嚴陵灘登其所謂釣臺者
而歌名賢之詩歌以弔嚴先生招其守祠宗人而來
相與話嚴先生時事蓋余貪游惜勝之思始淡然自

奇游漫錄 卷之一
失矣然又獨有譚議云今人但謂嚴先生高逸士迺
余嘗味其懷仁輔義阿諛順旨之語似非無意于世
者應聘而起謂帝差強于往已又不屈而歸誠未知
其指趣所在世人遂疑帝非先生知己又諫議官殊
輔相先生年高德邵固難栖栖爲小官屈余以爲旣
爲人臣亾論尊顯苟得行其道卽諫議輔相奚殊焉
使先生較量官資高下而後仕抑去世人不遠矣夫
巢由卽隨務光伯夷之倫先生或有意其爲人乎乃
其所表勵抑又急云當秦坑儒焚詩書蔑棄先王禮

樂仕者以刀筆吏爲師上霍下叛反戈相屠窅然喪
其廉耻而不一顧也漢承馬上之風因陋就簡未臻
興教實效陵夷至乎新室之篡諸儒獻頌功德惟恐
不暇蓋秦漢中衰風節濶絕先生殆傷之焉思以其
身而易天下俾區區鬪智角力階尺寸之士赧然羞
自負也東漢之季節義輩出黨錮諸賢甘心糜斧鑕
而不悔姦人睥睨漢鼎至積數十年莫敢動斯其風
謂非先生寔感倡之不可矣或迺高先生而過黨錮
諸賢豈誠肯於教哉嗟乎先生所爲維天常立人紀

弭亂消姦萌其大若此余故高先生之風而貪游惜
勝之思真淡然自失焉卽所譚議不中先生然先生
固知余非世人矣於是其宗人聞余語而起拜曰誠
不意遊先生釣臺者迺遂曠世而相遭請爲子釣而
沽酒焉以附釣臺遊談記時七月十有一日

遊青原山記

閏七月一日過洪都余三人欣然滕王閣之勝廼以
相公里第余曹忤相公人不欲泊遽棹而南數里學
憲王君追訪貽之閣中王韓序記刻讀其文如登閣

中坐也已而藩叅陸君臬副趙君臬僉馮孫二君載
酒追餞而馮於予同年友也則貽余青原山中黃魯
直詩刻謂余輩前而渡當出是山於是遊滕閣之興
轉而思遊青原山矣余諸生時督學宗主胡先生時
以都憲憂居聞余來預艤舟江滸旣至相勞問因勉
余堅志守道而別語中亦語游青原山事先生蓋講
學家云是月九日舟次吉安郡守黃君過而談青原
山之勝欲輟郡事同遊余三人堅辭焉已而私覓肩
輿渡河行數里抵山下山甚高峻前有劃壁一片跨

深澗而立若翠屏然諸峯環拱老樹插其左右泉潺
潺灌林中景象殊爽塏余輩渡石橋入寺有七祖堂
堂傍一龕供七祖真相其左爲宋長者祠余輩坐而
談思公開山禪教大闡及乎陽明子王子講學是山
提唱致良知三字今其門人高第弟子踵而會講者
不輟也然禪宗儒派漸混爲途聚議遊談或鮮實効
子王子意指不無少出入焉旣而尋訪羅太史鄒祭
酒兩公適兩公數日前下山去矣無緣一晤語殊爲
悵然日晡還舟從山掖而下時月澹林梢僧歸鳥外

青原幽致爰收一囊明旦起訪忠節祠復登城樓眺
白露洲衆木滙縈一渚仰抱東南諸山峯亦真奇秀
境余輩倚柱鼓歌喉有學子過而疑其爲仙云是日
午發吉安由黃岡潭下永新十八灘而潭中適遭大
風電舟斜欹至露底乃余坦然歌游青原山詩舟亦
遂定旣渡永新永新令馮君過訪居民至罷市聚觀
而道中遇劉上舍設飯相待則貽余三人夏游記各
一馬讀之知爲羅太史語迺益嘆青原講學之風能
令其士若民咸知嚮方無亦忠節祠流風餘韻子王

子寔鼓動之與若羅太史者可無作語已



奇游漫紀卷之二

明時遷客雲間董傳策原漢



記文 楚南結纜

病游衡嶽記

書藏樓書
整理 殷 湯
號 字 編列

年 月 日
余嘗有游五嶽之興茲歲以戌事出獲與友人張吳

二子偕當其去國懷鄉神與意積已而相過勞問道

中所苦生平壯志棄捐明時凝睇徘徊爽然自佚遂

迺順亨屯齊夷險覩堪輿之浩渺等萬物于鴻毛於

時游嶽之興彌劇焉屬當道衡湘以南計去衡嶽不

百里而近因預與二子謀必往無何張子奉其母從
便道歸而余與吳子顧猶迂棹從雷埠鎮入衡山邑
界然余以別張子時夜談良久病泔泔發矣時閏七
月二十五日也明旦庚午舟泊衡江吳子以及內病
不欲往余私自念萬里遐涉崎嶇間道本爲游嶽而
來復恹疴作不果人生安危有數寧緣兒女子態作
障耶爰偕周山人挈二山僕雇肩輿裹巾扶行吳子
猶哂其癖興也業旣行風色甚勁松陰蔽日病頗不
支余對周山人言此殆山靈砥礪我耶強獲真氣行

松間三十里申抵嶽下入憇穀道士房引觀房後流
泉從山巖滾滾下已令人游心灑然晚沐宿潔所於
時病倦山幽松風馳驟如甲馬頓覺夜涼永倍塵榻
二十七日辛未晨起焚香謁嶽神因徧閱中外諸勝
殿中氣象峩然旁有頽扁書天下南嶽四大字道士
云此卽宋徽宗御書扁嶽市者也中庭碑亭蒼蘚文
剝落不可辨殿後爲寢殿就峯石刻塑嶽神與夫人
像甚奇偉又過一室爲南極注生宮湛甘泉書道士
云民間祈嗣者詣此輒應魚水畜亦隊游至此散子

云余笑曰嶽神日不暇給矣時余病稍瘥周山人猶阻余上登余不應輒更乘竹兜子行嶺上穀道士率其徒從焉頃之漸覺天氣清朗日融風和余病亦瘥大半遂攀峻道而登危峯峭立絕壁倒掛滿眼皆山色也行三四里許望見衆峯中一峯巍然道士指曰此赤帝峯也其垂若團蓋斜對赤帝而高者則名紫蓋峯又懸崖而上五里許望見右峯撐立宛如羽葆道士云此香爐峯也左有二峯尖出視諸峯尤高雲隱隱騰腰間道士云此天柱峯也天柱之掖有峯名

金簡峯禹治水時獲金簡玉書處又仰而望一峯縹渺特尊獨余見之意卽祝融峯云時峯巒突沓不可狀道士亦不能盡名蓋已在赤霄間矣周山人素誇健踵亦倦坐喘息顧余云茅山絕頂不過此耳從人皆苦路峻而余風中歷嶮級了無病容周山人以爲神奇云又懸崖而上有瀑布泉飛出數十丈山石愈峻流愈駛瀏絡空明瑩成幅練響淙淙徹林壑下視山中空泊處村落已點如蟻蛭而其上復有耕夫樵豎乘風唱歌茅舍竹籬宛傍石壁真仙家也又三四

奇游漫錄 卷之二
里忽見老僧攜茶出肅飄飄然從峻嶺下指其居曰
半山亭去此三里願少憇焉余不省何來第從之行
捫蘿側足而上甫至亭下遽起立四顧寰中但見烟
雲繚繞層巒間世界溟濛漫漫若海霧狀萬山疊出
小若螺盃江湖渺引一線真不異浮漚也老僧肅余
曰請有間遂入室坐定僧爲余語云夜半夢朱張二
公持數函經與韓公同下肅客俄有癯然一夫來自
東北三公引之仰觀星象已而憑闌瞰大海中萬鳥
嚶鳴蛟龍翻翻驚起三公謂其人曰子異時有分到

此山絕頂可且歸矣朱張二公遂以數函經授之韓
公亦於袖中出授文字一卷倏然驚寤私卜度今日
誰當來印其占迺覩大德貌宛然夢中人也因戒余
毋遂登絕頂留爲後日重來遂贈以萬年松數枝而
去余顧所從游道士曰彼僧爲誰道士曰山中不識
此人意近日游方來耳余甚異之因憶韓退之彌明
道士傳殆紀實也念不可拗僧指語遂於亭中具齋
飯畢幡然從山左而下行三里抵會仙橋萬竹森然
響泉湧出巖石夾道而立深壑長松又一境界有道

人揖至祝仙巖啜茶復行松逕間石上有松間掩月
四大字又從澗邊入有堦石峯三大字遂小憩堦率
菴菴面皆山菴背皆泉竹引而汲了無喧世態也山
有鐘磬簫管聲山僧持手冊索書漫賦四律貽之又
賦二絕貽巖道人云復下二里許嶺嶮巖如天階望
見一大寺赴之則南臺寺也寺中頗有大觀亭刻諸
公題詠了無空壁因賦二律書片紙貽山僧云憇久
之下山歷石級數十百級抵岳麓訪胡文定公祠三
像儼然肅拜而出復訪白沙甘泉書院時日尚未晡

乃更令輿人肩七里至朱陵洞水泉飛瀑若珠簾垂
垂狀前有醉石卽仙人沖退石也道家以此中爲洞
天亦真奇境然其境奇而狹回視危峯壯觀海天空
闊較此清冷朗秀又別矣步回道房懷景朗吟復得
四律三絕夜深始就寢有夢二十八日壬申晨起謁
辭嶽神而歸出至雲開堂堂以韓公開雲得名因徧
觀詩刻道士爲設小酌已遂復乘肩輿沿山行四十
餘里至一村間削壁茂林俯瞰幽澗若虎丘劔石狀
要亦嶽麓餘景耳時吳子已挈余舟人由霞陵入衡

州郡界迺遂從西南路行五十餘里抵郡燈明時方
登舟云是役雖扶病登嶽尚稽絕頂之游然有兩大
奇事病以游瘥一奇也僧夢又一大奇也若夫群峯
錯出遠近殊態令人應接不暇水泠泠瀑不舍迂折
山腰湛無痕累匪惟凡襟洗滌兼得象外至文焉及
乎凌高望遠憑虛御空身世一塵我真安在於時又
無假泛蓬瀛搜溟渤而醒然脫縛解膠矣吳子周山
人以爲不可無記爰記之以須後游且錄一篇貽張
子云嘉靖戊午秋雲間董傳策記

游回鴈峯記

閏七月二十九日晦舟次衡陽之蒸江郡少府與其
倅羅郭兩君訪貽衡嶽志且謝緣薄不能從衡嶽之
游兩君因相顧語余曰在昔胡邦衡過衡山不登以
避人故而韓退之朱張二先生顧不憚凌雲雪游焉
公今病而游游而不使邑宰知殆兼之矣余笑曰游
適興耳奚必古今人兩君去余翻嶽志卽所游景猶
宛然在目顧獨以闕登祝融峯爲障僧夢也復私自
念當游峻嶺時俯瞰塵寰漫若煙霧迺今浮生又涉

此耶隨與吳子周山人李生登岸訪石鼓書院院爲
唐隱士李寬讀書處宋淳熙間始建先師燕居堂蓋
卽七十二峯中岫嶠峯也旣入謁先師像復從左而
入有祠三楹中供晦菴南軒二先生左右供黃勉齋
李寬及宋隱士李士真諸像就其中拜而出復從左
而入有合江亭當蒸湘兩水合流處亭祠韓昌黎其
上爲仰高閣面刻韓題合江亭詩南軒書余遽今摹
得一本藏之舟中因對韓公及朱張兩先生像恍然
悟僧夢之非凡抑三先生神靈固鑿琢我也援筆題

壁而韜其名已乃移舟迴鴈峯下登峯入寺次張子
壁間韻蓋已先渡五六日云寺僧安正邀憩竹房殊
清致因持冊索詩詩之而劉縣令復來訪致兵憲程
君書亦獨以三先生期我也雖一時致語猶不旁引
及異哉異哉夜與吳子醉卧僧房中周山人李生各
爲歌詩一章時秋色皎然風颯颯響竹際聽之忽有
鳴鴈聲余起坐顧諸君曰回鴈峯前聞鴈亦奇事抑
今鴈回而征人猶萬里也宇宙無窮古今若旦莫迢
渺天涯所玉成何事吳子爲之憮然因披衣歷山級

而下於時一望衡境咸收入顧盼中吳子遽以爲勝
觀而余顧渺然隘小之豈岳峯景界猶未忘胷臆耶
抑仙凡遠近卽真眸子亦自不同視也余以爲可喻
道乘漫并記之游記庶幾三先生其稽我焉

游浯溪記

浯溪古奇境也孤標一峯迥然臨瀟湘而枕祁陽之
上唐元次山卜築其中屬靈武中興光復兩京功最
大元因撰頌顏魯公爲書鐫石乃後人高魯公風節
且古漫郎文而浯溪之奇益表著余輩以八月七日

泊祁陽劉令社偕閻李陳三博士過訪遽折簡邀游
浯溪余得與惟修縱覽觀焉旣登崖閱頌文摩其字
畫巨石嵯峨與文字俱絕世稱三絕者也旁有片石
嵌壁間玄瑩可鑑了了辨山川色詢之厥名鏡石相
傳徃代傳詣行在光晦發還山乃復瑩如舊云左逾
渡香橋步出漫郎宅遺跡前臨一臺聳然層起劉令
設樽醪置席焉上有宋尊古製因就而酌酒旣酌相
與坐談唐事追思魯公守平原時已甚偉特後竟不
屈賊而死真奇男子也假令唐無國難如魯公輩終

不老歿翰墨間耳然曾南豐爲作祠記顧猶徒取其
堅貞撼頓之節百折不回而恠其學問文章間雜于
神仙浮屠之說不皆合于理余以爲南豐之語癡矣
夫仙佛家所稱引白日飛昇歷萬劫而不壞者豈盡
莊語哉直爲指云爾彼所謂傳道必得世間忠孝之
士者有以也如魯公舍生取義要於此中得力卽其
幻形雖歿而英聲義烈至於今猶耿耿不磨蓋真勘
破其教非雜之也於時令及三博士聆余斯語猶未
醒然會意獨惟修起曰魯公之神憑兄而語也以是

知魯公不歿矣語畢而賦詩貽王人以別夜將就寢
月射船窓復與惟修起登溪上李生爲具酌余三人
圍而坐因各談其鄉之人物醜好用寓思齊內省指
云亦仰止魯公餘興也是爲游浯溪記

游永朝陽巖因泛瀟湘記

余讀唐柳子永州諸山水記未嘗不嘆其文之奇詭
卓絕也旣以罪竄斥道由茲境益愀然願訪其故所
游處而游焉乃記所稱法華愚溪南澗者卽蕪沒不
可得游獨朝陽巖故在也而余與吳子以監押官之

暇蓋連日夜往游云當其弔古興懷尋幽命酌流羽
觴而發詠招衲子以談禪已復乘月班荆涼風乍爽
漣漪水色秋氣逼人咸屬吳子記之矣余不能更疊
作記游語顧獨於柳子事有概乎中而余從巖前訪
十賢祠則往昔名人官永者咸得祠惟柳子者不逮
焉余指謂吳曰柳子可惜祠不逮者可恨夫柳子奇
才乎奇才乎徒以少年英博之氣狎游兩王生謂可
藉手興堯舜烈忠在不知人以彼其才今稍知問學
悟理道豈至其身名委頓撼抑迄今千百年猶不獲

伸也乃余獨悲其一斥之後遽歸恬夷羈永數年蕭
然不擾有古寓賢之遺風焉其所爲游覽山川諸撰
次奇詭卓絕之文猶足命于世而不朽也彼其祠不
逮云者直規規時俗見耳夫司馬遷韓愈人之豪者
也遷救李陵愈友柳宗元爲文古之人憐才不詭時
好今視之有餘愧矣夫士有幸有不幸余游朝陽巖
觀記賢祠不逮柳子殆傷之焉吳子曰每病足下方
而介迺其持論寬若此誠不意游岩得新語矣於時
放舟瀟湘水清徹底而余懷屈平之艱貞憶湘靈之

哀怨廼顧益誦柳子去國竟已游懷人淚空垂之句
舟之人咸喟然興嗟不置也夜夢韓退之氏偕柳子
詣余謝曰得子可稱千載知己矣余寤而笑曰柳子
宜快也乃韓子憐才之意顧今猶未泯泯耶又安知
其不憑余而語云余輩幸不墮柳愆而今明時浩蕩
又無假憐才者而釋縛焉卽余所指記者繆耳繆耳
命之游永朝陽巖因泛瀟湘記蓋余有二指云

夜游沉香巖記

楚中自茶陵以南長沙衡永三郡綿亘諸山奇峯恠

洞層見絡出水清澈尤稱其山之奇余耳目所厭殆
幾不能狀記自永而出謂必無奇廼十四日丁亥晨
發石級渡諸灘午從船窓隙望見一峯壁殊詭絕舟
子云諸葛兵書山恨削立不能登焉夜泊陸埠游興
甚痒強拉岸邊人而問奇處有父老笑曰此境爲沉
香塘迤邐數里入深山中有沉香巖奇甚顧此仙靈
所棲道多猿猱虎兕非數十人秉炬操戈戟不易可
游今莫矣郎君且休矣余與吳子相顧呀然時月皎
如晝清風徐來余踴躍曰天假我游諸君游無恐余

二人乃與周山人李生飫酒糜命諸僕人飽飯執巨杖提竹燈籠而前余二人各持一劍周山人李生各持一弓矢信步徃游不覺逾數里至一高岡岡上層峯挺秀旁有老木垂藤下瞰清江一灣水月四面曠野蕭然殆非塵境也進而登巖巖甚敞余輩方坐命酌吳子遽倦而假寐余覩巖前有一小庵左覆漁磯右插青竹數竿景象幽閒乃獨徃而憩焉菴內一石函有書遽取視之丹書也意若游客所遺顧此人跡罕到安知非有詭秘人藏之名山以遺好事者余得收而珍惜之因爲賦詩一首已而周山人李生從岡掖來云彼中猿獠虎兕交印跡于道知父老之言非我欺也促余還舟過而撼吳子猶未醒余復與二人徧踏中外大都其境幽其石峻其篁木邃茂其壑澄而深其村落大曠非余輩劇興不能游游且不能適余故以斯游爲甚壯而吳子旣醒起而偕二人者歸則讓余筆記之余不得辭

奇游漫紀卷之三

明時遷客雲間董傳策原漢

記文 粵徼征次

游桂林諸巖洞記

余閱宋范穆公成大桂海虞衡志見其評桂山之奇
以為千峯崛然特立旁無延緣而玉笋瑤簃其森列
恠且多若此當為天下第一私竊意其為過言乃今
來游桂林觀諸峯巒巖從平地削出數百千丈不
假纖培而骨相蘄然玉立劒峙衆態畢呈或半空開

竅冥搜詎測或挺拔天表登頓無階其奇恠奪目驚
心殆不可具狀昔人所論列猶爲不及云余得稍游
覽其最著者采合傳志因爲撰次于左畧諸瑣瑣不
記八月二十有四日余與吳子泊舟桂江西臯復會
張子子儀是日學憲殷石汀君邀余三人游風洞巖
巖在疊綵山後石門砢研峭壁劃裂下瞰平野千峯
競奇雲樹滄勃洞中陰風襲人毛灑灑起立張子謂
卽當盛夏無暑而殷君遽持觴起飲復爲指點桂山
三峯龍從宛轉悉入矚界蓋竟日酣眺焉賦得古體

一首明日張子去余二人結纜伏波巖巖突起殊高
石懸如柱去地纔罅一線俗云馬伏波試劔石入而
有洞豁然約可容數十榻戶牖穿透俯瞰灘水洞中
踞石有巨人跡宛如刻紋又紫白二蛟蜿蜒相向有
浮翬絡其頂大似老龍戲珠洞因得名還珠或云馬
伏波傾所載薏苡于此因賦近體詩折而游眺水月
洞洞門踞江圓如滿月一統志稱濱江洞惟水月最
佳然不能過還珠洞也已又登崖望獨秀峯孤標直
聳頂平如蒼玉正面凝然秀整側視果如卓筆校諸

峯獨雄唐張固詩所稱南州擎天柱者也其北虞山
臨江有韶音洞宋張南軒先生有記刻崖間又明日
游隱山六洞余憶寰宇記唐李渤出鎮桂管見石門
大開有水泓澈迺疏鑿巖穴石林磴道若天造靈府
不可窮詰因名隱山蓋卽其地也山上六洞爲朝陽
夕陽南華北牖嘉蓮白雀洞各一天朗敞如厦屋雲
門逶迤亘薄野外俯跨田疇絕幽雅真寰中勝槩也
唐吳武陵韋宗卿俱有記由隱山轉出去七星巖甚
近余二人復挈周山人李生往游焉巖有七峯列如

北斗旁垂小峯如輔星緣磴而上山半有亭曰簪帶
亭其下爲曾公巖山根石戶中有澗水伏流宋曾布
帥桂跨澗爲石橋因以名巖橋下水聲泠泠寒氣侵
肌橋側有石乳雙懸如垂蓮頽雲危欲下壓度橋有
石池往昔鱗游其中今水稍涸復過野田數十步路
偻窄不甚可通頻視有石罅尺許無罅而進忽更高
廣其側逕可詣棲霞洞洞旁水清淺不流岸塹如削
余二人從石門而入頓覺坦夷爽塏約可列坐數十
人其上石乳凝結下復有洞名玄風初視洞口甚低

游者秉炬捫壁以進天門三層層各三耳前阻大壑
不可渡有路北行頽僂而前數步復寬衍兩旁十餘
丈石柱下垂如玉簪珠旒曲折躋攀所覽覩彌奇高
牙斷霓從空欹落斗室陰崖森幽徹髓從者慄慄持
酒榼爲各酌一巨觥復行食頃珍窩恠石交撐層峙
殊形詭狀盤巖竄頓其中詩者難工畫者難巧卽游
人猶錯迕相望稍認識漁網燈檠無量佛逍遙牀獅
象駱駝神工斧出宛肖人間世所有又踞老君像甚
古唐人因號爲仙李洞張成子詩刀圭影觸金丸彈

謂洞中景也洞倚層巖極玄遠扣其響石如鐘鼓鳴
余輩數人語笑聲如大甕中間雷宵隔塵世而崖棧
間澄水一泓滙成深淵路滑蒸崎嶇側行絕險凡三
里許始從頂上出世傳穴通九疑山以故其秘奇特
甚余意天壤間仙靈所棲或未必勝此卽桂山多奇
然如風崗之陡然擘出六洞之朗朗相屬跨已益奇
至如七星巖轉折獻勝重以玄風洞幽邃不易究竟
又其最益奇者也劉牧詩陰崖走別洞陽嶺帶廻溪
信然信然歸舟各賦近體詩夜深方就寢明日起眺

江涯將復游他所適巡院藩臬諸司出貢院來訪於是諸舉子亦來而秦生者道其父發解時遽棄去游仙不復返今其母尚在也余笑曰粵山好奇乃其人豈亦好奇若此午後往東北游屏風巖斷山高聳中有平地亦甚敞鍾乳倒垂透石穴而出山川城郭恍然如在壺中范成大建壺天觀空明巖刻銘于石又東游觀龍隱巖灘水分繞其旁下有洞深奧莫測龍跡天矯然印其上於時桂林諸巖洞之奇大畧已得游惟華景洞在城中逼近王公府遂不復入而堯山

有堯田特以桂山多石惟此獨積土蓋無他奇焉日晡放舟象鼻山山在訾家洲之西突起水濱厥形類象余輩方箕踞眺嘯適藩叅洪方洲君臬僉向懷葛君載酒來尋遂歡飲至夜分而別明日發舟下西南境入戍所道中山水猶奇迺更瘴靄迤靡四望荒落徭吹猿嘯聽之淒淒然余顧益猛有躊躇愧戍靡非其柄也因憶姑蘇袁永之氏游桂山記謂其山石險峭宜生蠻獠狝獍之類爲民蠹又意淑詭奇偉之氣不鍾之人而鍾之物余以爲不然夫人寰風氣寔開

奇游漫紀 卷之三
五
拓荆蠻於越曩亦榛疆八桂雖遙良非殊域且石巖
巖等耳失之邪或歸險峭得其正堪秉孤貞彼其人
靈心故在也抑 天王統壹區寓覃牧黔黎詎應鄙
夷絕徼中謂必難振禮教古今俗移須政植政維人
特患分疆宰割者未暇經籌云爾夫山川草木夷裔
之主非其人誰當焉又安知八桂諸巖洞之間異時
不有賢豪士出而剪除荒穢興起斯文與天壤相終
始也漫并附麗之記中庸論後人之好游者因復得
粵西山水歌一篇云

渡灘江記

湘水經興安海陽山斷爲灘水流而泝靈川其渠甚
偏仄本秦史祿所鑿今寘斗慎啓封云斗畔悉蒼莽
區曠無居人時時有蠻獠數輩持挺倚巖谷間幸其
蠢蚩無大害然客游者自此非夷境矣獨桂林當最
高處控制數千里披山帶江裒然西南要會世謂桂
嶺摩天灘波經地水環湘桂山類蓬瀛迺猶離郭伊
邇遽嘯諸獠屬邑古田永福間大爲占據朝除宰貳
至不敢入界予予從省司候差遣余蓋覩而憤焉自

奇游漫記 卷之三
桂以南迤而接虜陽朔昭平旁及左右兩江藤峽入
寨大都諸獠深阻今惟府江爲尤甚府江卽灘江也
以迫平樂府名府江又以灘水流至此益疏迅名灘
江余素聞其險爰與吳子留連桂林數晷須諸藩守
出棘院挈之行至是九月五日發桂林越七日渡陽
朔道中巖石尤奇崛就其羊皮元寶諸峯突兀空透
飛挂疊數節下瞰牛樂匙鑰天河纏脛諸灘大非常
目所經觀陽朔人蘇御史木追訪舟次語中更及灘
江苦險阻余輩兩舟人有戒心云是日逾燕子巖白

面雷公諸山徭人村八日渡龍頭磯出灘江兵憲林
君載酒餞江滸已而兩舟人與藩叅吳君梧邕守何
郭二君並放中流日晡泊長灘九日晨發吳君舟觸
石幾破舟中帶有人匠粘罅至旁午復發於時瘴霧
彌野山川咸不可辨旁午猶無日光吳君設桑寄生
酒邀余與吳子酌之云敵瘴氣復出鴈蕩山茶烹以
解醒吳君鴈蕩人也語中誇鴈蕩之奇余笑曰若不
覩此灘江景乎夫灘江水波層絡下春石齒兩岸皆
高山峻谷然吾儕身渡之不得游抑不可一瞬目焉

卽若所談中土奇游不且重有感恬方履澤哉不且
重有感恬方履澤哉吳子遽障余喙曰子又酒發矣
俄而窓縫稍豁因捲簾矚兩岸山廼有獐惡獠人數
百群挾戈戟伺險灘上余輩幸舟順流其遡而上者
篙稍緩輒被逗逼鹽米吳君蓋坐而目擊之與余輩
咨嗟良久因憶田少叅汝成藤峽府江議謂剿藤峽
寇宜速剿府江宜緩又有疑剿撫二議誰適從者余
覽覩其槩大都江峽勢相連繹未應異治諸獠志索
鹽米非有遠圖彼中峒丁招主往往釁狀相通今昭

平建設土巡司亦畧扼其咽喉謂宜聽諸土官報効
兵自齎糗餉勦逐苟得尺寸地卽以立其支子爲巡
司官仍於要害處隨在設巡司令通峒丁鹽米禁其
侵暴久而化誘諸獠爲良民因可潛消土官諸子第
相雠殺事或亦一籌策耳日晡泊大龍灘十日晨發
午抵昭平復逾馬難唐鈞上曲下曲石龍諸灘至上
洋堡泊十一日發上洋堡逾上洋下洋峴殼龍口月
口爛板諸灘自出灘江諸灘俱險而馬難尤甚水當
灘處湍洶若飛矢石尖尖錯兀其底遡流者篙高竟日

難上順流尤虞觸石灘旁復多滙深潭其上嵐氣重
透鼻中聞之至不可忍四野菁莩邃蔽鳥棲絕少時
有二三水鳶墮而前昔人所稱仰視飛鳶沾沾墮水
中蓋實景也柳詩千山鳥飛絕萬徑人踪滅又添嵐
瀛徯三苦云十二日舟抵蒼梧漸覺岸有人跡間見
一二小舟蕩槳而過然猶數十百里無村烟江灘亦
尙多險回憶江左風流不啻縣霄壤云爾日晡何部
兩郡守置酒馮大夫園中邀余兩人話別二君余同
年友方有事入覲夜泊蒼梧明晨南發作行路難辭

三十首

渡左江諸瀧記

九月十三日出蒼梧登閱白鶴觀暮泊羅洲灘十四
日渡藤縣萱洲縣產柝蛇釀蛇酒隔江數里爲洲洲
有孤村其氓採熬黃藤膏點火眼暮泊大灣自此入
大藤峽韓襄毅公征蠻時斷藤處也十五日渡白馬
十二磯暮泊白馬堡十六日渡黃婆五龍諸灘午抵
平南復渡大小黃岡諸灘暮泊牛石堡十七日渡銅
鼓灘自出蒼梧通海潮其瀧水多濁不類湘桂清流

至是水分兩大支一入左江一入右江云午抵潯州
王叅戎夏尹諸官人訪談銅鼓之險暮泊前村十八
日風泊十九日渡浪灘吳日選日到橫槎遽并力先
刺船去暮泊石門自蒼梧來鬱蒸不異盛夏者至不可
衣單衣而搖櫓人裸程袒裊猶汗流浹背至是忽雷
聲震烈雨大作如注頓覺瘴氣疎爽人至穿夾襖子
云二十日雨泊二十一日渡大壬灘時風雨猶颯颯
不止秋氣蕭然江中峭無行船岸多叢高其路通諸
蠻洞雖逆流不可挽纜惟以篙櫂施中流馬暮泊石

龍岡猿聲清淒孤舟雨夜不能不攪離人臆也二十
二日渡貴縣馬駟諸灘暮泊六村埠二十三日渡大
急水小急水四層諸灘舟子云其境多剽寇暮泊鄉
江二十四日渡大銅鼓馬槽烏蠻龍門泥壁諸灘而
烏蠻尤險灘流駛處噴如匹練中突巉巖亂石作澎
湃旋舞狀迤邐幾三十里是日風順舟子猶努力撐
鐵頭篙雖陰霧中至汗透其衣自辰至申始克達云
灘上有漢伏波將軍廟舟過者必謹謁祀余作詩弔
之其云志託風雲堪躍馬身依日月尚還珠蓋難其



原件短缺

P10 以后缺

遭也於時鷓鴣倒挂諸異鳥啼聲徹耳老榕蟠腫祠
畔令人益增悲歌感慨之思焉二十五日渡黃泥苦
竹諸灘因憶鄉人贈行詩云落日玄猿啼苦竹秋風
黃葉下烏蠻實境語也午抵橫州晤吳子相與話橫
槎風景因入訪其旅舍署州陳節推君攜酒過飲暮
泊橫江二十六日天始霽辰發橫江渡上下三十里
灘暮泊蕭李埠二十七日渡磨麪諸灘野泊二十八
日發數里抵火焰有雷埠磯風勁甚不可渡遂泊二
十九日風泊三十日晦晨發渡老鼠洞諸灘泊十月

奇游漫紀卷之四

明時遷客雲間董傳策原漢

記文 行役載途

烏蠻瀧夜談記

世稱蜀中峽粵中瀧余未游蜀未獲睹峽狀迺今游
粵渡諸瀧真誠江道巨險卽亾論府江險最甚其在
左江諸瀧若烏蠻灘其著者也歲戊午冬余時以入
戍溯流而渡越庚申秋余從戍所出送家嚴君至蒼
梧出而順流入而溯流合徃還爲一渡焉又越甲子

春轅門檄余探海徼倭寇事迺又從戍所出渡蓋七
歲中三渡險瀧幸無他患苦良嘆奇遭哉良嘆奇遭
哉於時余挾橫槎仙子陸生者登謁伏波祠夜泊烏
蠻灘上談漢事笑指岸祠謂曰若覩此公作何狀夫
逸夫之與豪傑士未易同日語矣彼所爲窮堅老壯
斷斷赤心報國真漢奇男子若屬玄修逸適無意人
世事迺亦過式斯祠乎陸君曰嘻蝶伏鴻翔誠當其
時可矣風流遷客何遽惱人如是余又笑謂曰若胡
乃殊時論耶夫嚴子陵馬文淵斯二人蓋同光武時

然子陵委志高尚就徵不屈思以其身挽世靡競之
風而文淵垂老功名屢請出塞至不憚衝炎涉瘴以
身殉國夫斯二人雖殊趣迺其致非繇一轍者與子
陵當仕而處以矯貪文淵當休而出以矯猾世之徼
寵避難者視二人宜媿歟焉夫談理性者類擯其人
爲未學然彼豪傑士顧又莫能效嘖拾潘依樣畫葫
蘆云陸君者王陽明子之徒也聆至此而感額改容
余復曰王先生自比伏波旣建社稷功猶不辭思田
之役雖委曲招就諸黠酋尙稽正法獨其憂國奉公

古游漫紀 卷之四
効節不顧私良無異伏波武溪事云屬者安南不廷
皇赫斯怒三將軍臨關按兵承望相指無能當
上任使者然無事後謗忌迺於是益信王先生所爲
非顧毀譽計利害者卽其學非空譚比矣陸君曰足
下不聞灘聲乎夫今淙淙奔湍聽之若激而覽觀之
若飛舞者彼其中有不能平也然而巨險迫人焉自
古功名之際蓋難處矣故爲嚴陵則易爲伏波王先
生則難走故烏蠻人敢忘烏蠻巨險哉子休矣談無
所用之矣迺相與假寐舟中明晨北發與之舍而談

逸游事

游南山記

余夙聞貴邑南山之奇初入戍渡貴雨不克游庚申
送家君出渡行遽不克游還而再渡王少府預設酒
招游有主人矣迺余心緒愴然又不克游及是始獲
與陸山人同往游云旣渡江登岸輿行可六七里望
見野疇上有青嶂數撮至則其撮高者有窟如大甕
窟中有窟如門入而景象軒敞約可列坐數十人亦
奇巖洞也巖上鏤佛象俗子更覆屋椽焉其左復有

一竅空透石傍鑄流雲洞三大字洞之絕頂又復有
洞甚奇天窓晶晶然石乳初零棧壁如劃較視橫槎
空洞巖差小其層邃複折畧相似因口占一詩而還
復與陸山人箕坐江邊老木上木中空穴宛肖巖狀
遂名之爲木巖余顧陸山人曰假令蜂蟻攢游其中
寧不類吾輩游南山誇奇乎相顧一噓登舟北發

渡羅滂記

蒼梧以東爲粵東境余所未嘗涉覲至是行 始渡
云三月二十三日發梧川避暑吳尙書園亭 書卽

東湖公廷舉粵西先正中最廉直者桂梧靈秀殆鍾
焉二十四日辰發於時嵐煙蔽江上溽暑逼人舟子
裸衣搖櫓余輩偃息篷底如甌中坐也蟲飛縉縉撲
鼻面尤可憎莫泊封川竟夜不能寢二十五日出羅
滂江羅滂故寇境兩岸重山迴谷綠陰繁茂望之有
和尚峯甚奇江道苦不甚闊諸蠻子時時乘輕舸出
沒其間鈎行舟剽人衣貨近更猖獗舟子云深山產
漆樹諸蠻子採以漆楮皮爲船及作楮甲殊輕捷每
剽得人衣貨卽連舟背負去地多胡蔓毒藥草菁草

雜刺跬步聞其穴逕窈遠至通大羅山藤峽八寨迤
接雲貴諸洞口以故未易剿絕官設打手邏警往往
計通互市此殆守者責也是日余渡中流忽遙見蓬
跣數十群披甲露刃已而果扛小輕舸下江若向余
舟余遽令舟子輩放銃鳴鑼鼓急射矢著山上樹傳
呼江面官打手防護諸蓬跣者艤舟莫敢動無何抵
德慶其嶺有陸太中祠蓋漢陸賈使南粵時過此又
宋李綱玉乳巖三大字見存莫泊江灘不寐二十六
日辰發日晡抵肇慶其江爲古端溪郭外隔江已據

寇窟瘴氣亦不減經途宋之新恩春卽其屬州邑真
險惡區也仕紳或以爲佳郡意嶺外法紀闊疎當得
便所適耳因憶包孝肅知端之政且感胡澹菴流寓
鮮遺跡焉肇慶守鄒雀山余西曹時舊寮也過訪舟
次尋載酒款余至夜分去明晨北發鄒君追送江滸
因與余步游堤菴更約往探七星巖會雨不果往已
而鄒忽挾其貳倅諸君各餽余金余悉堅辭之鄒君
復贈余端溪石兩片且云聞君旅居清苦今又辭故
人金石當充壓船耳余斂容曰苟志得金奚殊隔江

音游漢紀 卷之四 五
人鄒君輩竦然起曰足下一言媿墨吏敢忘加勉遂相與大笑留其二石而別

游峽山飛來寺記

自出肇慶江稍平氣稍朗頓令人游興飛動既轉清遠江忽憶張子儀及方郡守曾為余語峽山飛來寺之勝亟趣舟往探焉俄見兩岸青峯插出南北擘峙滙其江流束隘如帶世稱茲境為福地余登其寺果雅絕有二禹祠讀書坑相傳黃帝二庶子大禹仲陽隱居處從祠左渡橋而上有泉名定心泉因坐挹泉

亭汲而嘗之甚清甘泉上為觀音閣諸僧云昔有高僧掘泉不得忽觀音現語曰汝禪心未定僧益定心超修已遂掘得清甘泉焉余笑曰汝輩各各有泉亦患未定心耳又轉歷石級而上清陰礙日涼颼爽然有半雲亭眺視曠處水石覺已高僧云此半山也於時扳磴捫蘿直凌絕頂果有古寺名飛來云寺從飛棧上挂出穹懸欲墮危雲幻界縹渺一覽垢消神竦翛如清都迺與同游客酌酒前亭謂諸僧曰寺既飛來會應飛去何者為客何者為主諸僧愕不能答余

與客同作游飛來寺詩憇頃之拂衣下山諸僧烹泉
水茶來供坐峽寺方丈吸之已乃從寺右躋探葛壇
石有葛仙亭相傳葛洪煉丹處嶺外葛洪遺跡不一
而足其所歆勾漏丹砂今在粵西鬱林境已爲徑寇
占棲亦無丹砂可採古人寓指點化人率此類也近
江有龍磨角石甚堅澤磨痕宛然其左上爲達磨石
謂達磨西來時禪坐處又下爲釣鯉臺石趙胡釣鯉
貢秦皇處江畔有犀牛潭晉咸康中崑崙國貢犀至
此亡入水余一一就視各勝復從寺右上山繞出絕

頂後探所謂孫恪遇猿妖有歸猿洞安昌期題詩棲
隱有和光洞五色榴花及跋多羅三藏法師所見僧
化狻猊石咸窈沒不可得乃悟此亦寓指耳卽前所
覽觀諸勝蹟要不可膠柱猜云下峽寺出門立望其
前峯聳然對如屏障僧云卽縹幡嶺唐將討哥舒晃
夢峽神縹幡助勝遂名焉又江灣一嘴廻環處名疑
碧灣蘇坡老詩云天開清遠峽地轉凝碧灣余因和
其全首韻仍於諸勝蹟各題一絕句夜泊峽江明旦
發旣發而聞大羅山寇是夜出峽山近畔剽掠余尤

喜奇游中脫一厄云

游英德觀音巖記

英州故多奇秀境余從瀧水北渡舟子云此名彈子磯處起視之奇瀧石也又類小瀑布已渡而泊觀音巖石峯壁立下有小洞甚低入而梯滑磴以上復有透窓可瞰江水結構觀音閣頗整余與同游客小酌錄其閣上詩一首云青峯挂半壁石洞懸方壺玲瓏嵌寒壁滉漾生虛無凌風躡雲梯靈光灼肌膚青苔繡人衣白雲疑香爐老笠立而語翩翩丹雀癯久坐

聞風泉灑然沃醍醐人世苦繁累使我顏面劬暫得眠石牀其樂如清都我明吳廷翰作也不知何許時人已而下磴遇一道人指示洞逕窈暗處云此觀音鎖妖猿處余笑曰世間妖猿何限恨不遇真觀音悉鎖之耳因作游巖詩以真假觀音命筆不復寫景蓋已有前人佳題也更聞邑郭數里外碧落洞奇甚時日已下春不及游聞其洞名到難真到難哉英石玲瓏篋空有數十種大都產巖洞百粵瘴烟至此亦幾淨云廓然子曰余渡滇江覩記英州巖石之奇蓋懷

唐子方之流風未有遺焉及轉曲江披閱曲江集韶石諸山詩追稽張丞相余經畧兩公廼益嘆山川萃秀產彼良材將相雙超哀然名獻信嶽降生申之語非虛也重以慧佛出世大闡壇經宿劫積迷破洗殆盡彼所謂真觀音者非耶然海內迂儒狡士拾其涎緒蔽我真修猶自高談闊視託附理學可慨已余獨恠地靈人傑氣機化遷自兩公迄今數百年彼其人安在余蓋徘徊其間竟日不能去

游曹溪南華寺記

佛氏之離障近正者莫如曹溪方其說法度衆曾依寶林厥後更號南華自唐迄今幾千餘載爰聞山澤鍾靈諸梵刹猶然淨爽不類嶺外境余夙欲結游而未由會廼歲甲子初夏余行役過韶於時有陸山人偕陸山人者善參禪宗者也因與欣約爲曹溪之游是月七日巳卯渡濛濛始覩曹溪流殊清駛將循厥道而登苦闕肩堦子越九日庚辰抵韶少憩隔江之通天塔行有刻矣韶守呂湘泉君渡江來訪邀游芙蓉巖還復設宴塔寺竟日且止明日辛巳余與陸山

奇游漫錄 卷之四
人戒途凌策諸峯而南逾五十餘里至曹溪始覩卓錫泉及泮溪經流大清迅既入寺見六祖真相遂至方丈占佛笑篇且語陸君曰曹溪真訣不離自姓一切法相悉名幻妄今茲肖形建刹其謂之何陸山人曰相亦非相法未着法余笑曰子六祖後身矣衆僧聞而愕然因乞解楞嚴經隨出步諸境登大鑒靈照塔憑其頂眺諸峯南華形勝悉具隻眼便翻寺志獲識象嶺爐峯邈躡前後迴掇疊嶂襟帶曹泮兩溪似茲占奇宜挺異衲方相與話曹溪本指須透生死關

方成徹悟俄而風烟四合雷殷殷起雨且飄塔中矣余亟欲下陸山人未有行色姑挾之下第二層復話易震驚不喪七鬯沉吟作詩無何雷適自塔中起陡聞猛震一聲從高覆搏大似金峯酷裂狀顧見火迸閃塔中恍類撒星拋毬諸從者已暴然僵仆如風折枯株噤無奄息余神色自若徐呼陸山人避牖外於時赫赫真如淨根頓徹令人罔可容纖私誠本來面目也已而火遏石頂不散塔傾可虞余復高聲呼諸從者其一人稍甦猶瞑眩不成步余迺拉陸君從火


煙中先尋徑而下遇二僧僵始甦其瞑眩不成步如
從者又下一層則二僧僵不起或方昇之去矣余兩
人端坐相顧曰今番證明真果洞徹生殺園機去來
自由如如不動良若斯乎良若斯乎尋令寺僧登殿
從人余所從四人者其一人亦甦手持寺志及余佛
笑篇片紙雖經火中無恙然與前甦者皆不省何故
又燎眉足衣袖衣幾危其二竟僵不起如僧數云塔
頂角及其下剝石皆霹裂而僵者一人霹角傍更楚
僧一人霹剝石諸寺僧遙見火焰罩塔雷聲震撼辟

易聽者輒股栗走度塔中人必難脫而余二人獲無
毫髮損咸以爲有神護云余顧心憐諸僵者愀然發
惻隱之容既乃喚僧徒收而封之曠原余爲唏噓起
曰嗟乎蠢爾暴折倏驚竟離夫造物者誠堅淬余儕
詎意猝迫此蠢氓乎余蓋傷胞與懷云又曰凡夫禡
神哲者辟險鴻毛泰山理齊用別余儕宜戒游矣陸
山人曰易象天雷無妄書載納麓弗迷故時有儻來
機無必測在昔富鄭公經霹靂而悟入劉元城養浩
氣以沒寧王真子洩易蘊而召攝其諸雄夫獨值類

異凡流載籍所傳良非幻界且今一震而禡神以往
與其復還者幾相等焉吾二人顧同參證之如夷境
也奇孰有逾此者乎夫神者為主而不為客者也造
物小兒神樞化轍匪關損益疇變玄黃芻狗庸愚足
下無過但矣余斂容曰果哉適且神乎哉吾將廓而
徹之乎形骸之外而愈固吝之乎形骸之內吾目中
已失南華其孰謂斯非真我與是夜假寐南華寺於
時精神聳發夢竟更清余夜半起撫同游者曰此真
子時大活明且壬午詣禪堂索曹溪衣鉢觀之向所

留傳已焚今其湊泊成者僧復出唐宮中所捨繡羅
漢及正統時捨繪觀音像絕佳遂與陸君前步曹溪
仍策諸峯而還韶守隨訪舟次因相與話茲異韶守
竦然起語曰貞夫秉衷逸流證果妙賦超突幹此殊
艱叩畏兩夫君神定哉便自及洞庭遭風不亂事余
私矢心曰余儕好奇以眺岡宦人履恒而渡澤猶經
不測事若斯史家所稱引豈獨嶺瘴傾人誠有味乎
其語之也士當彌自鍊修必成偉丈夫志寧復趨起
顧忌沾沾作兒女子態耶且今亾暇佛喻印學至學

要惟貴我養吾常我以有常應無常方將役物而不
為物役又奚問其測不測矣易曰先天天不違後天
奉天時敬念哉記之游南華記承以自觀省云



浩浩江流地脈寬。孤峯突兀障狂瀾。海門東折龍
經躍。古寺中欵密欲窺。六代河山行裏過。三吳
風景客中看。迤邐此際堪招隱。竹葉吹蕭度
紫雲。

焦山月悟齋一焦山志卷十一

詩殊平仄。鈔者記。

要情貴我養吾常我以有常應無常方將役物而不
為物役又奚問其測不測矣易曰先天天不違後天
奉天時敬念哉記之游南華記永以自觀省云



浩浩江流地脈寬。孤峯突兀障狂瀾。海門東折龍
經躍。古寺中欹露欲寒。六代河山行裏過。三吳
風景客中看。迤邐此際堪招隱。竹葉吹蕭度
紫雲。

佳山月悟齋一佳山志卷十一

詩殊平仄。鈔者記。

